

principio Cesare non credeva che 'l Turco venisse in Germania, ma fato certo dil suo venir li cresete l'animo a difendersi, poi a venir a la zornata con lui, et preparò un bellissimo exercito qual zà molti centenera di anni non è stato el simile in christiani, et rechiedendo Ferdinando parte di quello per andar in Hongaria, Soa Maestà non volse, dicendo voler queste forze operarle a beneficio de la christianità, per mostrar al mondo io non fugo el conflitto col Turco, dicendo di le differentie dil vayvoda col re suo fratello non me impazo. Hozì al tardo Soa Maestà sarà de qui, va ai soliti soi piaceri de caza per camino, et ha mandato a dir al capitano Doria, venga con l'armata a Zenoa si però qualche occasione non lo impedissa, et Soa Maestà spera haverla a Zenoa avanti la fin de novembrio o principio de decembrio, sopra la qual vol passar in Spagna. Li fanti italiani che mutinorono, monsignor de Granvillia mi ha dito è aselati, et che anderano per altra via che per questa, et che l'imperador ha dito è creditor di loro di zorni 20 et loro dicono esser creditori de zorni 30. Soa Maestà vol saper la verità; è stà conseiato a farli taiar a pezi, non ha voluto farlo, anzi non se dica Soa Maestà haverli conduti in Alemagna et poi fati morir, se ben i meritino mille morte. Quelli a Filbuch, loco lontan da Vilaco mia 14 italiane, hanno fato cose da non creder, amaza homeni 36, intrati in una chiesa over ospedal hanno robà, gitato el sacramento in tera et tuti li lochi non murati restano abandonati, tuti è fuziti a le montagne, et di se vedeno su li monti, la note vieneno zoso a le caxe, quanti troyano li amaza senza alcuna remission et ne è stà morti assai et svalizà molte carette. Scrisi le zente vien con questa Maestà saranno più de 30 milia, et infiniti impedimenti, non se pol andar per le strade, da tante zente si da pè come da cavallo et molte carette, ma homeni di guera sono alemani 4500 pagati per 6 mila, yspari 6000 et più i qual fano da 3 zorni in quà disordine, li cavalli lizieri 1200 oltre la casa di la Cesarea Maestà. Heri vene nova a questa Maestà Turchi che corseno verso Linz fo serati dal conte Palatino, et bona parte se salvono in Hongaria quasi tuti è stà morti per camin, si che in Buda non son tornati 300, et cussì è seguito in altri luochi, si che la ritirata dil Signor turco fu vera qual era come fugato, et Strigionio di l'asedio fin hora si tien sia libero. Il principe de Sulmona et monsignor de Lasciam secondo somilier de questa Maestà ha mandato a dir voler venir a veder Venecia et li fazi un passaporto over salvoconduto. Li ho mandato a dir

non bisogna, *etiam* il reverendissimo Medici vol venir a Venecia, li ho dito sarà ben veduto.

*Dil dito, da Frisach, di 15, ricevute a dì 18.* Come in camin have nostre letere di 11, col Senato, digi a la Cesarea Maestà fosse ben veduto, et di la eletion de 4 primari oratori per acompagnar Soa Maestà per il nostro Stado, il che, zonto qui, comunicai a Soa Maestà, et lo vidi nel volto de haver gran piacer, et usò parole de ringratiar molto, dicendo fateli intender io comprendo ogni zorno più l'amor che la Signoria me porta, et di tal cosa non mi son per domenticar, et firmateli ch'io non ho altra intention nè altro è il desiderio mio salvo mantener in pace et union Italia, et non saran fati desordeni per le fantarie nel passar, et altre gente, et haver scritto di fanti italiani mutinati saria bon separarli et desunirli. Poi Soa Maestà dimandò de castelli et lochi de Friul come de lo lozar, li risposi esser tristi, et per mia 25 italiane bisogna portar con sè vituarie, per esser montagne fino a Gemona. Soa Maestà disse, sarete col comandator maior et monsignor de Granvile et ragionate dil camino, perchè cussì exeguirò. Soa Maestà va a San Vido poi Vilaco dove starà 2 giorni per asetar la corte, qual è tuta in fasso, et a li 25 over 26 sarà dentro la patria de Friul. Scrive siamo ussiti dil morbo, tuti è sani, et poi la morte dil secretario valdese tuta la soa caxa ha pratica con li altri, morse do servidori a l'arcivescovo de Bari, qual soa signoria se volse absentar, l'imperator non volse *imo* come lo vete lo abrazò facendo beffe de tal cosa al comandator maior, è morto el barbier qual l'havea la sera discalzato, et *tamen* pratica con tuti. Monsignor reverendissimo de Medici con il conte de San Segundo za zorni 3 fono retenuti in San Vido, stete do zorni in pregion, poi fo licentiat, et conte restò in preson imputandoli esser sta cauti de la sulevation de fanti per causa dil cardinal. Questa Maestà si ha mandato a excusar con soa signoria reverendissima, et che l'ordine fosse intertenuto per uno todesco, uno spagnol, uno fiandrese, si che mai dito cardinal have la maior paura in sua vita, et credo mai più tornerà in Alemagna, el qual è partito et vien in Italia, questo intervene a Malzara.

*Da Milan, di l'orator, di 13, ricevute a dì 17 dito.* Avanti heri questo illustrissimo signor ave letere dal suo secretario in Franza, di 15, come el re Christianissimo saria poi 3 zorni a Pariscon, la corte, et se expediva monsignor el gran maistro per lo abocamento se dia far col re de Anglia. Don